

# Staziuns da mesiraziun e servetschs da preavertiment

■ (cc) Per mesirar las precipitaziuns, las temperaturas ed il vent sco er per survegliar moviments da massa sco per exempel bovas vegnan impundids en il Grischun totalmain 1,8 milliuns francs ils onns 2016 fin 2019. La regenza ha approvà ils custs per la gestiun e per il mantegniment da staziuns dal sistem interchantunal da mesiraziun e d'infurmaziun Imis sco er per il manaschi dals systems da preavertiment. Tenor la cunvegna da program «Ovras da protecziun en il gaud» surpiglian il chantun ina part da 45 pertschient e la confederaziun ina part da 35 pertschient dals custs totals.

Il sistem interchantunal da mesiraziun e d'infurmaziun Imis è vegnì svilupà l'onn 1996 en collavuraziun cun la confederaziun, ils chantuns, las vischnancas ed ulteriuras gruppas d'inte-

ress. El cumpiglia staziuns da mesiraziun che vegnan coordinadas e survegliadas dal WSL institut per la perscrutaziun da la naiv e da las lavinas (SLF) a Tavau. Las datas servan sco basa per elavurar ils bulletins da lavinas naziunals e regionalis. Ultra da quai vegnan ellas duvradas per avvertiments locals da lavinas.

Sistems da preavertiment vegnan duvrads per survegliar per exempel ils moviments da massa al Cuolm da Vi sur Sedrun u la bova a Brinzauls. Els èn in agid indesistibel per las personas responsablas en las vischnancas per avvertir ad ura la populaziun e per ordinar las mesiras correspondentas sco in'evacuaziun u ina serrada da la via.

**Ulteriuras infurmaziuns sut: uffizi da gaud e privels da la natira.**